04 來學校上期待的時間 (中年級組)

王英娟

「秀娟阿姨,後禮拜的菜單會使借阮看袂?」好啊! 恁若有想欲食的物件攏會使共阿姨講,阿姨會當請廚房阿姨煮予恁食。「誠實的喔!會當看菜單,閣會使家已點菜, 佇遮讀冊有夠幸福的啦!」彼是當然的啊!絕對愛煮恁佮 意食的料理,嘛定著愛攢恁愛食的點心!因為恁是阿姨上 重要的人客,人客食了有滿意,就是我上大的快樂。」

秀娟阿姨設計出來的菜色逐工攏無全,予阮遮的學生 囡仔,平常時仔除了會使食著衛生的飯菜,閣有麵包、雞 卵糕、豆奶、牛奶、蘋果汁……足濟項點心,逐工都輪流咧 等阮。食著的各種菜蔬、果子也攏是上鮮、上著時的,予阮 食甲飽 tin-tong 閣食著滿足。若拄著舊曆的節日,猶閣有割 包、肉粽、圓仔通食,遐濟物件予阮食袂瘩嘛食袂飫,毋但 食飽、食巧,閣食著營養,上重要的是食著一種幸福的滋 味。

廚房阿姨的手藝有夠讚,毋但鹹汫下甲拄拄仔好,閣 有法度煮出秀娟阿姨開出來的種種新菜色。阮全班便若看 著廚房阿姨揀餐車來教室,連鞭就同齊共廚房阿姨講:「感 謝你一粒一的服務,嘛感謝你辛苦的付出。」廚房阿姨就 會笑吻吻。 啊若秀娟阿姨咧?伊毋但定定會先去廚房試鹹汫,閣會不三時來巡看阮逐班食中畫頓的狀況,溫柔仔問阮講:「飯菜有夠無?料理有佮意無?」紲落去,伊閣會共阮歡喜食中畫頓的畫面翕起來,傳起去群組分享予家長看遮的寶貝囡仔食甲真樂暢的模樣。

我捌共阿母講:「學校的愛心媽媽遐爾濟,用心共我飼甲肥朒納,予我有氣力認真讀冊拚頭名。厝內的阿母干焦你一个,煞惜我惜甲疼命命。全款驚我枵著,散學攢點心予我紮去補習班食,轉來閣有阿母牌的宵夜通食。」阿母笑笑仔回我講:「恁學校的護理師阿姨看著你生肉閣生甲遮爾緊,面腔料想會加真歹看喔!」

若問我來學校上期待的是啥物?是上電腦課、體育課 抑是下課咧?我會講:「攏毋是,我上期待的是食營養午餐 啦!」